

Nerukkaatissanut suliffeqarfiit pillugit Kalaallit Nunaannut nalunaarut

Nerukkaatissanut akussat pillugit inatsisip Kalallit Nunaannut atuutilersinneqarnissaanik peqqussummi nr. 1578 af 21. december 2022-meersumi § 1, imm. 1 aamma 3, nr. 1-10, § 1a, imm. 1-2 aamma § 7 malillugit inuussutissalerinnermut, nunalerinnermut aamma aalisarnermut ministerip piginnaatitsineratigut aalajangersarneqarpoq:

Immikkoortoq I

Atuuffii nassuiaatillu

§ 1. Nalunaarutip, nerukkaatissat akussaasa sumingaanneersuunerannik sumullu nassiuuneqarsimanerannik paasisaqarfiginnissinnaanermut aamma utertitsinneqarsinnaanermut, aamma salmonellamik akiuiniarnermik qulakkeerinnissinnaaneq pillugu kiisalu nerukkaatissanut suliffeqarfiit akuersissuteqalersinnissaannut piumasaaqatit aqqissuussaanerillu pillugit aalajangersakkat, nerukkaatissat eqqiluisaartinnissaannik qulakkerinnittut, aalajangersarpai.

Imm. 2. Nalunaarummut ilaapput nerukkaatissanut suliffeqarfiit pisuni tamani ingerlataat, matumani nerukkaatissanik suliaqarneq, assartuineq, toqqorsineq, tuniniaanissamik pilerisaarineq aamma atuineq.

Imm. 3. §§ 7-25-mi aalajangersakkat taamaallaat nerukkaatissanut suliffeqarfinnut, nerukkaatissanik avammut tunisassatut tuniniaanissamik pilerisaaruteqartartunut imaluuniit nerukkaatissanut avammut tunisassatut imaluuniit nerukkaatissanut akussatut avammut tunisassatut aalajangiunneqarsimasunik passussisartunut taamaallaat atuupput.

§ 2. Nalunaarummi uani tulliuuttut ima paasineqassapput:

1) Nerukkaatissanut suliffeqarfik: Pisortat imaluuniit namminersortut ingerlataat, iluanaaruteqarnissaq siunertaralugu imaluuniit iluanaaruteqarnissaq siunertarinagu tunisassiornerup, suliaqarnerup, piliornerup, toqqortarinninnerup, assartuinerup imaluuniit siammarterinerup ilaanik sunilluuniit suliaqartoq, matumani kinaluuniit tunisassiortoq, nammineq uumasuuteqarfimminini uumasut nerukkaatissaannik tunisassiortoq, piliortoq imaluuniit toqqortaqartoq.

2) Ulorianartoq: Nerisassani imaluuniit nerukkaatissani, imaluuniit nerisassat qanoq issusaannut imaluuniit nerukkaatissat qanoq issusaannut, uumassuseqartutigut pinnguutitut, akoorutissanut kemii atorlugu akuliussinnaasunut imaluuniit tigussaasunik (igalaamineq, qisuk, ujaqqanit, saviminernit il.il.) t ulorianaatinik attuumassuteqartumik peqqissusermut ajoqutaasumik sunniuteqarsinnaasoq,

3) Tunisassiornermut-, piliornermut- aamma siammarterinermut ingerlatat ilaasut: Ingerlatat tamarmik, matumani nerukkaatissanik pingaarnerusumik tunisassiorneq, toqqortarinnineq, assartuineq, tunisineq imaluuniit atuisussamut tunniussineq.

- 4) Nerukkaatissanik eqqiluisaartitsineq: Piareersaatit aamma piumasaaqatit, ulorianaatinik akiuinermi pisariaqartinneqartut aamma nerukkaatissanut akussat nerukkaatissatut, siunniunneqartut atorneqassappata, naleqquttuunerannik qulakkeerinnittussat.
- 5) Nerukkaatissanut akussanik pingaarnertut tunisassiorneq: Nunalerinermi tunisassianik tunisassiorneq, matumani ingammik naatitsineq, killuineq, immuiaaneq, uumasunik kinguaassioritsineq (toqoraaneq sioqqullugu) imaluuniiit aalisarneq, taamaalillutik killorneqareerneranni, katersorneqareerneranni pisarineqareerneraniluuniiit taamaallaat pisariunngitsumik suliarineqarsimasunik tunisssiorneq.
- 6) Tunisassiat: Nerukkaatissat, akooriikkat, akuutissat, nerukkaatissanut akussat aamma tunisassiat allat, nerukkaatissani atorneqartussatut imaluuniiit nerrukkaatissatut atorneqartussatut aalajangikkat.
- 7) Orsunik akuukkat: Nerukkaatissanik akuukkanik suliaqarneq, imaluuniiit taakku akui tamarmik naasut suussusaannik ataatsimeersuuppata imaluuniiit uumasut suussusaannik ataatsimeersuuppata, uulianit sukuluarneqanngitsuneersuuppata, sukuluarluarsimasuneerpata, uumasut orsuineersuuppata, uulianit Kalaallit Nunaanni suliffeqarfinnit nerisassaleriffinnit atoqqitaneersuuppata, Kalaallit Nunaanni suliffeqarfii nerisassaleriffiusut pillugit nalunaarummut ilaasunik suliaqarneq, imaluuniiit taakku sinnerannik uulianik imaluuniiit orsunik akuukkanik suliaqarneq; taakkununga taamaallaat ilaangillat tunisassiat immikkoortitat imminnut tulleriittut aamma uulianit sukuluarluarsimasunit akuukkat toqqorsimavinniitsinneqartut.
- 8) Passussineq: Nerukkaatissamik tigussaasutigut qanorluuniiit passussineq, matumani toqqorsivimmuut ilioraaneq aamma assartuineq.
- 9) Aalisakkanit qajuusaasiat: Aalisakkanik ilivitsunik ilaannilluuniiit uunnaanikkut, naqittaaikkut aamma panersaanikkut suliaq, tassani panersiisoqartinnagu aalisakkanit qajuusaasianik akusisoqaqqittoqarsimasinnaavoq.
- 10) Aalisakkanit uulialiaq: Uulia aalisakkanit ilivitsunik ilaannilluuniiit uulialiaq, aamma imermik imaanik piiaalluni kaavitillugu siggorneqarsimasooq (uumasut suussusaannik paasisutissartaqarsinnaasooq, ass. saarullit tinguisa iginnera).
- 11) Nerukkaatissat (nerukkaatissanut akussat): Akussat imaluuniiit tunisassiat tamarmik, matumani nerukkaatissanut akuutissiat, piareersagaasimanngikkunik imaluuniiit tamarmiusumik ilaannakuusumilluuniiit piareersagaasimagunik, uumasut nerisassaattut aalajangiunneqarsimasut.
- 12) Nerukkaatissanik akuugaq: Nerukkaatissanit minnerpaamik marlunnit akuugaq, nerukkaatissanut akuutissianik akullugit akunagilluuniiit, uumasut nerukkaatissaattut naatsorsuussat, nerukkaatissatut vitamininik mineralinillu akusatut imaluuniiit nerukkaatissatut akuutissanik akusatut suliarineqarsimasut.
- 13) Nerukkaatissat: Naasuneersunit imaluuniiit uumasuneersunit tunisassiat, pingaarnertut uumasut inuussutissanik pisariaqartitaannik naammassinnittussatut pingaarnertut siunertalik, pissusissamisoortut allanngortinnagit, pisaat nutaat imaluuniiit anaveersaakkat, aamma taakku sinnerisa suliffeqarfissuarni suliarineqareernerisa kinguner, kiisalu uumassusilinneersunit imaluuniiit uumassuseqanngitsunit akuutissiat, nerukkaatissanut akuutissianik akoqarsinnaasut, aamma uumasunut nerukkaatissatut aalajangiunneqarsimasut, allanngortinnagit imaluuniiit suliareqqaarlugit imaluuniiit nerukkaatissanik akuukkanik suliaqarnermut atugassat imaluuniiit akooriikkani atugassat.
- 14) Tunisassiat immikkoortitat: Nerukkaatissat aalajangersimasunik annertussusillit, ataatsimut ilisarnaatillit, soorlu sumingaanneernerat, pissuseqatiginnerat, poortuutaasa qanoq ittuunerat,

nassiussui imaluunniit nalunaaqutsersorneqarnerat aamma tunisassiorfimmi ataatsimi ataatsimik arlalinnilluunniit assigiinnik tunisassiornermi suleriaaseqartoqarpat, imaluunniit arlariinnik taamaattunik immikkoortortaqqarpat, taakku ingerlaavartumik piliarineqarsimanerat aamma ataatsimoortillugit toqqortarineqarnerat, tamarmik nalorninaallisarneqarsimappata.

15) Nerukkaatissanut akuutissaq: Akuutissat, tappiorannartut aamma kemi atorlugu pilersitat, nerukkaatissanut akussaangitsut aamma akooriigaangitsut, aamma siunertaqarluni nerukkaatissanut akussanik imaluunniit imermik akusat atuuffimmik ataatsimik arlalinnilluunniit naammassinninniarluni, ataani taaneqartunik:

- 1) nerukkaatissanut akussaasa pissusaannik pitsaasumik sunniineq,
- 2) uumasuneersunit tunisassiat pissusaannik pitsaasumik sunniineq,
- 3) akviami aalisakkat aamma timmissat inimiititat qalipaataannik pisaasumik sunniineq,
- 4) uumasut inuussutissanik pisariaqartitsinerannik naammassinninnissaq,
- 5) uumasuneersunit tunisassiornerup avatangiisinut sunniutaanik pitsaasumik sunniineq,
- 6) uumasuneersunit tunisussarsiornermik, suliarinninnermik aamma atugarissaarnermik pitsaasumik suniineq, pingaartumik bakterianik inalukkaniittunik pitsaasumik sunniineq imaluunniit nerukkaatissanut akussat arrorsarnissaanut pitsaasumik sunniineq, imaluunniit
- 7) coccidiostatisk imaluunniit histomonostatiskimik (uumasuni, ingammik kukkukuuni coccidia-parasitsinut allamut nipinngaalluni miluuttunut) toqoraanermik piiaanermilluunniit sunniuteqartut.

16) Akooriikkat: Nerukkaatissanut akussaatinik akuukkat imaluunniit nerukkaatissanut-akuutissat nerukkaatissanik ataatsinik arlalinnilluunniit akuukkat toqqaannartumik nerukkaatissatut atugassatut aalajangiunneqarsimanngitsunik akuukkat imaluunniit imermik, passussinermut oqilisaaffiginissaa siunertaralugu akuukkat.

Immikkoortoq II

Nerukkaatissanut suliffeqarfinnut nalinginnaasut

Kapitali 1

Suminngaanneersuunerannik sumullu nassiunneqarsimanerannik paasisaqarfiginnissinnaaneq aamma utertitsisinnaaneq

§ 3. Nerukkaatissanut suliffeqarfiit tamarmik tunisassiornermi-, piliornermi- aamma siammarterinermi ingerlatani tamani nerukkaatissat aamma akussat allat akuliunneqartussatut imaluunniit akuliunneqartussatut naatsorsuutigineqarsinnaasut pillugit suminngaanneersuunerannik sumullu nassiunneqarsimanerannik paasisaqarfiginnissinnaanermik qulakkeerinnittussaapput.

Imm. 2. Nerukkaatissanut suliffeqarfiit nerukkaatissat aamma akuutissat suulluunniit nerukkaatissanut akuutissatut naatsorsuussat imaluunniit nerukkaatissanut akuutissatut ilanngunneqartussatut naatsorsuutigineqartutut aalajangiunneqarsimasut suminngaanniit pissarsiarisimanerlugit uppersarsinnaasariaqarpaat. Siunertamut tassunga aqqissuussinerit suleriaatsillu pilersinneqassapput,

taamaalilluni paasissutissat taamaattut qinnuigineqarnermi Fødevarestyrelsenimut atugassiissutigineqartassapput.

Imm. 3. Nerukkaatissanut suliffeqarfiit tunisassiaminnik suliffeqarfiit allat nassiussiffigineqarsimasut sumiinnerat pillugu uppersaasiornermut aaqquissuussinerit aamma suleriaatsit pilersissavaat. Paasissutissat taakku qinnuigineqarnermi Fødevarestyrelsenimut atugassiissutigineqartassapput.

Imm. 4. Nerukkaatissaq, tuniniaanissamik pilerisaarutigineqartoq, imaluuniit tuniniaanissamik pilerisaarutigineqartussatut naatsorsuutigineqartoq, naleqquttumik meqqilerneqassaaq imaluunniit suussusilerneqassalluni, uppersaasatit naleqquttut paasissutissallunniit immikkut ittumik aalajangersakkani piumasaqatit malillugit suminngaanneersuunerannik sumullu nassiunneqarsimanerannik paasisaqarnissamut oqilisaataasinnaasunik.

§ 4. Nerukkaatissanut suliffeqarfik, nerukkaatissaq nerukkaatissanut suliffeqarfiup nioqqutissatut eqqussimasaata, tunisassiarisimasaata, piliorsimasaata, suliarisimasaata, piareersaaffigisimasaata imaluunniit siammartersimasaata nerukkaatissat isumannaatsuunissaannik piumasaqaat eqquutsissimangikkaat isumaqarpat imaluuniit isumaqarnissamut tunngavissaqarpat, taava erngertumik nerukkaatissap pineqartup niuerfimmit utertinneqarnissaa siunertaralugu qanoq iliornissaq pillugu piareersaasiupallassaaq, aamma Fødevarestyrelsi tamanna pillugu paasitillugu. Taamaattoqartillugu aamma imm. 3-mi pineqartuni, nassiunneqarsimasut imaluunniit tunisassiani immikkoortitani nerukkaatissat isumannaallisaaffigineqarnissaanut nerukkatissanut akussaanut piumasaqaatit eqquutsinneqarsimangippata, nerukkaatissat aserortinneqassapput, Fødevarestyrelsen aaqqiissutissamik allamik akuersissuteqanngippat. Suliffeqarfiup nerukkaatissanik atuisut sunniuteqarluartumik aamma eqqortumik tunisassiap tunuartinneqartup tunuartinneqarneranut tunuliaqutaasut pillugit paasitissavai, aamma pisariaqarpat tunisassiat atuisunut tunniunneqareersimasut utertissallugit, peqqissusermut naammattumik qaffasissusilimmik illersuinerimik angusaqarnissamut iliuutsit allat naammangippata.

Imm. 2. Nerukkaatissanut suliffeqarfik niuertarfimmik imaluuniit siammarterinerimik suliffeqarfimmik akisussaaffeqartoq, aamma nerukkaatissap poortuutaannut, nalunaaqutsersorneqarneranut, isumannaallisaavigineqarneranut imaluuniit innarligassaanginneranik sunniuteqanngitsoq, tunisassiat nerukkaatissianut akussanut isumannaallisaanikkut piumasaqaatinik naammassinniffiusimangitsut nammineq ingerlataqarnermini sinaakkutit iluanni niuerfimmit utertittariaqarapai, aamma nerukkaatissat pillugit isumannaallisaanermut isumaginneqataassaaq paasissutissanik attuumassutilinnik, nerukkaatissap suminngaanneersuunerannik sumullu nassiunneqarsimanerannik paasisaqarnissamut atugassanik ingerlatitseqqiissalluni, tunisassiortut, piliorinnittut, piareersaasartut imaluuniit Fødevarestyrelsen suleqatigalugit malittarisassanik suliaqarsimaneq malillugu.

Imm. 3. Nerukkaatissanut suliffeqarfiup erngertumik Fødevarstyrelsen nalunaarfigissavaa, isumaqaruni imaluuniit isumaqarnissamut tunngavissaqaruni nerukkaatissap, suliffeqarfiup tuniniaanissamik pilerisaarutaata, nerukkaatissat akussaannut isumannaallisaanermut piumasaqaatit eqquutsissimangikkai. Suliffeqarfiup nerukkaatissat pineqartut pillugit ulorianaatinik pitsaaliunissamut piareersaatigineqartunik Fødevarestyrelsen nalunaarfigissavaa, aamma arlaata Fødevarestyrelsenimik suleqateqarnissaa suliffeqarfiup akornusersussanngilaa, suleqataanerata nerukkaatissani ulorianaatit pitsaaliuiffigisinnaappagit, annikillisarsinnaappagit imaluunniit suujunnaarsissinnaappagit.

Imm. 4. Nerukkaatissanut suliffeqarfiit Fødevarestyrelsen qanoq iliornissamut piareersaatit pillugit suleqatigissavaat, nerukkaatissami, suliffeqarfiup tunniussaani imaluunniit imminnut tunniunneqarsimasuni ulorianaatink pinngitsoortitsinissaq siunertaralugu.

Kapitali 2

Salmonellamik akiuiniarneq

§ 5. Nerukkaatissanut suliffeqarfiit nerukkaatissani salmonellabakterianik sunniuteqarluartumik pitsaaliuissassapput aamma akiuisassallutik.

§ 6. Salmonellap bakteriaanik nerukkaatissani nassaartoqarpat, bakteriat (svampit virusilluunnit) qanoq ikkaluarpata, nerukkaatissaq tuniniaanissamik pilerisaarutigineqassanngilaq. Nerukkaatissaq, tuniniaanissamik pilerisaarutigineqartinnagu salmonellamik akiuiniarluni sunniuteqarluartumik suliarineqarsimappat, peqqinnartutullu aamma nalinginnaasumik niuerutigineqartussatut pitsaassuseqartutut ippat tuniniaanissamik pilerisaarutigineqarsinnaavoq.

Imm. 2. Salmonellap bakteriaanik nerukkaatissami nassaartoqarpat, tamannalu inuit imaluunniit uumasut peqqissusaannut navianartuusooq nalilerneqarpat, nerukkaatissaq ulorianartutut nalilerneqassaaq.

Imm. 3. Nerukkaatissaq imm. 2 malillugu inuit uumasulluunniit peqqissusaannut navianartuusooq nalilerneqarpat, taava nerukkaatissanut suliffeqarfiup § 4-mi allassimasunik naleqquttunik iliuuseqassaaq.

Immikkoortoq III

Nerukkaatissanut suliffeqarfinnik nalunaarsuineq aamma akuersissuteqarneq

Kapitali 3

Nalunaarsuineq aamma akuersissuteqarneq

§ 7. Nerukkaatissanut suliffeqarfiit:

1) Nalunaarsorneqarnissaq siunertaralugu suliffeqarfiit atiminiittut tamaasa, aamma nerukkaatissat akussaannik tunisussarsiornermik, piliornermik, toqqortarinninnermik, assartuinnermik imaluunniit siammarterinnermik suliallit Fødevarestyrelsenimut nalunaarutigissavai.

2) Fødevarestyrelsen suliffeqarfiit aqutsisuuffigalugit atiminiittut tamaasa pillugit, tak. nr. 1, paasisutissanik paasisutissat kingulliit ilanngullugit paasitittassavaa, matumani ingerlataqarnermini allannguuteqartoqarpat aamma pioreersoq suliffeqarfik matuneqarpat Fødevarestyrelsen nalunaarfigisassallugu.

§ 8. Nerukkaatissanut suliffeqarfiit, nerukkaatissanut akuutissianik, ilanngussaq 4-mi allaaserineqartunik tuniniaanissamik pilerisaaruteqarniartut, taamatumunnga Fødevarestyrelsenimit akuersissuteqassapput.

§ 9. Nerukkaatissanut suliffeqarfiit, tuniniaanissamik pilerisaaruteqarnermut atugassanik nerukkaatissani atorineqartussanik orsunik akooriniarunik, tamatumunnga Fødevarestyrelsenimit akuersissuteqassapput.

Kapitali 4

Nerukkaatissanut suliffeqarfinnut nalunaarsorneqarsimasunut aamma akuersissuteqartunut nalinginnaasut

§ 10. Nerukkaatissanut suliffeqarfiit, pingaarnertut tunisussarsiornermik ingerlataqartunut aamma taamaalillutik tassunga atassuteqartunik ingerlataqartut, tak. ilanngussaq 1, nerukkaatissanut akussanik pingaarnertut tunisassiornermut aamma ingerlatat tulluuttut pillugit ilanngussaq 1-imi aalajangersakkanik malinnittussaataapput:

- 1) tunisassiorfimmi nammineq pingaarnertut tunisassianik assartuineq, toqqorterineq aamma passussineq.
- 2) tunisassiorfimmi nammineq pingaarnertut tunisassianik tunisassiorfimmit suliffeqarfimmut allamut tunniussinissaq siunertaralugu assartuineq.

Imm. 2. Imm. 1-imi allaaserineqartunit allaanerusut ingerlatat pillugit, nerukkaatissanut suliffeqarfiit ilanngussaq 2-mi aalajangersakkanik eqquutsitsissapput.

Imm. 3. Nerukkaatissanut suliffeqarfiit, ilanngussaq 3-mi aalisakkanit qajuusaasiornermi suliaqarnermi aalisakkanit qajuusaasianik atuineranut passussinermullu ingerlatanut atatillugu immikkut ittumik piumasaaqatit eqquutsinneqarnissaat qulakkiissavaat.

§ 11. Nerukkaatissanut suliffeqarfiit taamaallaat:

- 1) suliffeqarfinit nalunaarsorneqarsimasunit imaluunniit nalunaarut una malillugu akuersissuteqartunit nerukkaatissanut akussanik pissarsiniarsinnaapput aamma atuisinnaallutik.
- 2) suliffeqarfinit nalunaarsorneqarsimasunit imaluunniit nalunaarut una malillugu akuersissuteqartunit assartussinermik aamma toqqorsiveqarnermik kiffartuunneqarnermik atuisinnaapput

§ 12. Nerukkaatissanut suliffeqarfiit, ingerlatanik § 10, imm. 2-mi pineqartunik suliaqarunik, aalajangersimasumik allassimasumik suleriaaseqassapput imaluunniit allassimasumik suleriaatsimik aalajangersimasumik HACCP-imut tunngavinnik tunngaveqartunik atuutsitsilissapput, aallaartitsillutik aamma malinnillutik.

Imm. 2. Tunngaviit, tak. imm. 1, malitsigisaatut, nerukkaatissanut suliffeqarfiit pineqartut ima sulisassapput:

- 1) ulorianaatit, pitsaaliorneqartussat, suujunnaarsinneqartussat imaluunniit akuerineqarsinnaasumik qaffasissuseqartilertugit annikillisarneqartussat suussusilissavaat,
- 2) immikkoortut aarlerinaatillit pitsaaliornissaat, suujunnaarsinnissaat imaluunniit akuerineqarsinnaasumik qaffasissuseqartilernissaat siunertaralugu nakkutigineqartussat pingaarutillit suussusillerneqassapput
- 3) aarlerinaatillit nakkutigineqartussat aarlerinaatitut killilerneqarlutik aalajangiiffigineqassapput, taakku pissutsinik akuerineqarsinnaasunit pissutsinut akuerineqarsinnaanngitsunut immikkoortitsiffiussapput, ulorianaatinik pitsaaliuinissaq, suujunnaarsitsinissaq imaluunniit ulorianaatinik paasineqarsimasunik annikillisaanissaq siunertaralugu.
- 4) aarlerinaatilinnik nakkutigineqartussanik nakkutilliinermut sunniuteqarluartunik suleriaatsinik aalajangiisoqassaaq aamma ingerlatsisoqarluni
- 5) nakkutilliinermi paasineqarpat pingaarutillit nakkutigisaq ajortumik ingerlasoq, taava aaqqiissutissanik iliuuseqartoqassaaq
- 6) iliuusissat nr. 1-5-imi allaaserineqarsimasut naammannersut aamma sunniuteqarluartumik ingerlanersut uppersarsarniarlugu suleriaatsit atulersinneqassapput; uppersarsaasiornermi suleriaatsit akuttoqatigiissumik ingerlanneqartassapput

- 7) nerukkaatissanut suliffeqarfiup qanoq inneranut aamma angissusaanut naleqquttunik uppernarsaasiortoqassaaq aamma nalunaarsuisoqartarluni, taakku nr. 1-6-imi iliuusissat allaaserineqartut sunniuteqarluartumik atorneqarnerat pillugu uppernarsaataassaapput.

Imm. 3. Tunisassiami, suleriaatsimi tunisassionerulluunniit ilaani, piliornermi, toqqorsinermi aamma siammarterinermi allanngortoqarpat, taava nerukkaatissanut suliffeqarfiup suleriaaseq misissussavaa aamma allannguutissat pisariaqartinneqartut suliarissallugit.

Imm. 4. Nerukkaatissanut suliffeqarfiit, imm. 1 aamma 3-mi suleriaatsit allaaserineqarsimasut malillugit uppernarsaasionerup ingerlaavartumik nutarterneqartarnissaa, qulakkiissavaat.

§ 13. Nerukkaatissanut suliffeqarfiit nalunaarsukkat imaluunniit akuersissutillit, suliffeqarfiit nerisassalerifiit pillugit Kalaallit Nunaannut nalunaarut malillugu nerisassanut akussatut atorneqartartussanik uumasunik kinguaassioertitsisinnaangillat, imaluunniit nerukkaatissanut akussatut atorneqartartussanik uumasunik kinguaassioertitsisinnaanatik, uumasut sinnikuinik tunisassianik aamma taakku sinnikuinit tunisassianik avammut nioqquteqarnek pillugu Kalaallit Nunaanut nalunaarummi pineqartunik.

§ 14. Nerukkaatissanut suliffeqarfiit akuersissutillit aalisakkat uuliaannik nunanit allanit eqqussanik, atuillutik aalisakkat uuliaannik orsunik akoorisinnaangillat, nerukkaatissatut imaluunniit nerukkaatissat ilassaatut atugassatut tuniniaanissamik pilerisaarutigineqartussanik; **nerukkaatissanik, uumasut sinnikuinik tunisassianik, taakkulu sinnikuinik tunisassianik avammut nioqquteqartarnek pillugu Kalaallit Nunaannut nalunaarut malillugu.**

§ 15. Nerukkaatissanut suliffeqarfiit akuersissutillit aalisakkat uuliaannik, suliffeqarfinit nerisassaleriffinit atoqqinneqartartunik atuisinnaapput, suliffeqarfik nerisassaleriffiusoq inuussutissanik avammut nioqquteqartarnissamut akuersissuteqarpat, **niueqatigiinnermut aamma nerisassat avammut nioqqutigineqartarnerat aamma nerisassanut poortuutissat pillugit Kalaallit Nunaannut nalunaarut malillugu.**

Kapitali 5

Fødevarestyrelsenimut nalunaaruteqartarnermi aamma akuersissuteqartarnermi suleriaaseq

§ 16. Sumiiffimmi ingerlatanik nutaanik suli aallartitsisoqanngitsaq Fødevarelsenip pulaarnermini nalunaarummi uani piunasaqaatit attuumassutillit suliffeqarfiup nammassisimagai paasippagit, Fødevarestyrelsenip suliffeqarfik akuersissummik tunissavaa.

Imm. 2. Nerukkaatissanut suliffeqarfiit Fødevarelsen akuersissummik tunisinissaq siunertaralugu pulaassanngitsaq qinnuigisinnaavaa, suliffeqarfimmi niuerneramik taamaallaat ingerlataqarunik ingerlatsivimminilu tunisassiaqartoqanngippat.

Imm. 3. Nerukkaatissanut suliffeqarfiit, tak. imm. 2, Fødevarestyrelsen aalajangigaat malillugu, nerukkaatissanut akussaq tuniniaanissamik pilerisaarutigisartik aamma ingerlatatik nalunaarummi uani piunasaqaatinik eqquutitsisut pillugu Fødevarestyrelsen nalunaarummik tunissavaat.

§ 17. Fødevarestyrelsen piunasaqaatitalimmik akuersissuteqarsinnaavoq, summiiffimmi pulaarnermi paasineqarpat, suliffeqarfiup atassuteqaasersuutinut atortussanullu piunasaqaatit tamaasa eqquutsissimagai. Piunasaqaatitalimmik akuersissuteqarnerup kingorna kingusinnerpaamik qaammatit pingasut qaangiunneranni sumiiffimmi pulaaqqinnermi paasineqarpat piunasaqaatit eqqortinneqarsimasut, imaluunniit suliffeqarfiup Fødevarestyrelsenip naliliinera malillugu allakkatigut

uppernarsarsinnaappagu § 16, imm. 1-imi piumasaqaatit eqqortinneqarsimasut, Fødevarestyrelsen aatsaat akuersissummik tamarmiusumik tunisisinnaavoq.

Imm. 2. Erseqqissunik siuariartoqarsimappat, kisianni suliffeqarfiup piumasaqaatit tamaasa eqquutsissimangippagit, Fødevarestyrelsenip piumasaqqatitalimmik akuersissuteqarnini sivitsorsinnaavaa. Taamaattorli piumasaqaatitalimmik akuersissuteqarneq katillugu qaammatit 6-it sinnerlugit atuussinnaanngilaq.

Imm. 3. Nerukkaatissanut suliffeqarfiit, tak. imm. 1 imaluuniit imm. 2, Fødevarestyrelsenip aalajangigaanik ilusilimmik, tuniniaanissamik pilerisaarutigineqartup nerukkaatissatut akussap aamma ingerlatat, nalunaarummi uani piumasaqaatit eqquutissimagaat pillugu nalunaarummik Fødevarelsenimut saqqummiussissaaq.

Kapitali 6

Nerukkaatissanut suliffeqarfiit, matumani nerukkaatissanut suliffeqarfiit pingaarnerusumik tunisussarsiortartut, nalunaarsorneqarnissamut aamma akuersissummik qinnuteqarnermut nalunaarutaat

§ 18. Suliffeqarfiit, nerukkaatissanut suliffeqarfittut nalunaarsorneqartussat imaluuniit akuerineqartussat, tak. §§ 7-9, aatsaat aallartinneqarsinnaapput Fødevarestyrelsenimut nalunaarutigineqarsimagunik imaluuniit Fødevarestyrelsenimit akuersissummik tunineqarsimagunik.

§ 19. Suliffeqarfiit, nerukkaatissanut suliffeqarfittut nalunaarsorneqassagunik imaluunniit akuersissummik tunineqassagunik imaluunniit allannguutinik annertuunik nalunaaruteqassagunik Fødevarestyrelsensip nittartagaani digitalimik immersugassaq atorlugu nalunaaruteqartassapput.

Imm. 2. Akuersissummik qinnuteqaammut suliffeqarfik pillugu allakkatigut allaaserineqarnera aamma illup sannaata titartarnera, kiisalu suleriaatsit aqqissuussinerillu allaaserineqarnerat ilanngunneqassapput soorlu § 10, imm. 2 aamma §§ 11-12-imi taama allassimasoq.

§ 20. Fødevarestyrelsen pisuni immikkut ittuni aamma allakkatigut tunngavilersukkamllu qinnuteqarnermi, nerukkaatissanut suliffeqarfittut nalunaarsorneqarnissamut aamma akuersissuteqarnissamut atatillugu tak. §§ 7-9, digitalimik attaveqaqatigiinnissamut piumasaqaammik saneqqutisisinnaavoq.

§ 21. Fødevarestyrelsenip § 7, imm. 1, nr. 1 malillugu nalunaarsorsukkamini suliffeqarfinni ingerlatat ataasiakkaat tamaasa nunami namminerimi nalunaarsuiffimmut ataatsimut arlalinnuunniit ilannguttarpai.

Imm. 2. Nerukkaatissanut suliffeqarfiit, §§ 8-9 malillugit Fødevarestyrelsenimit akuersissutillit, immikkut suussutsimik uppernarsaammik normulerlugit nunami namminerimi nalunaarsuiffimmut ilanngunneqartarput. Suussutsimut normu tunniussaq ilanngussaq 5-imi allaaserineqartutut ilusilerneqartarpoq.

Imm. 3. Fødevarestyrelsenip suliffeqarfiit pillugit allattorsimaffik allattorsimaffiilluunniit imm. 1-2-imi allaaserineqartut tamanut saqqummiussinnaavai.

Kapitali 7

Matusineq aamma piginnittut nikinnerat

§ 22. Nerukkaatissanut suliffeqarfimmi Fødevarestyrelsenimi nalunaarsorneqarsimasumi imaluunniit akuersissutigineqarsimasumi piginnittut nikippata, taava suliffeqarfimmik pigisaqalersoq, kingusinnerpaamik ulloq tigusiffimmi allakkatigut piginnittut nikinnerat pillugu Fødevarestyrelsenimut nalunaaruteqassaaq.

Imm. 2. Nerukkaatissanut suliffeqarfik piginnittut nikereerpata ingerlatat, siusinnerusukkut piginnittup nalunaarsorsimasaanik imaluunniit akuersissuteqarluni ingerlassimasaanik suliaqarluni nangitsisinnaavoq. Nerukkaatissanut suliffeqarfik ingerlatanik allanik aallartisisinnaanngilaq Fødevarestyrelsen akuersissummik nalunaaruteqartinnagu imaluunniit taakku pillugit nalunaarsuisimangippat.

§ 23. Nerukkaatissanut suliffeqarfiup matunerani, suliffeqarfiit Fødevarestyrelsenimit nalunaarsorneqarsimasut akuersissuteqartulluunniit, matusimaneq pillugu allakkatigut Fødevarestyrelsenimut, kingusinnerpaamik matusinermi ullormi nalunaaruteqassapput, tak. § 7, imm. 1, nr. 2.

§ 24. Fødevarestyrelsenip suliffeqarfiup arlalinnik ingerlataqarnera imaluunniit tamanik ingerlatsinnaaneranut nalunaarsugaanera imaluunniit akuersissuteqarnera atorunnaarsikkallarsinnaavaa suliffeqarfiup piumasaqaatit, ingerlatanut atuuttut eqquutsisinnaajunnaarai paasineqarpat.

Imm. 2. Atorunnaarsitsigallarneq, suliffeqarfiup piumasaqaatinik nutaamik eqquutsitsilernissaata tungaanut sivisussuseqartarpoq. Piumasaqaatit ukioq ataaseq qaangiutsinnagu eqquutsinneqarsimangippata, taava nalunaarsorneqarsimaneq imaluunniit akuersissuteqarneq atorunnaarsinneqarsinnaavoq, tak. § 25.

§ 25. Fødevarestyrelsenip nerukkaatissanut suliffeqarfiup nalunaarsorneqarsimanera imaluunniit akuersissuteqarnera atorunnaarsisinnaavaa, suliffeqarfiup ingerlataa ataaseq arlalliluunnit ingerlatai eqqarsaatigalugit, imaattoqarpat

- a) Suliffeqarfiup ingerlatani ataaseq arlalliluunniit suliarinnaarpagit
- b) Paasineqarpat, suliffeqarfiup ukiut ataatsip ingerlanerani piumasaqaatit ingerlatsinerminut atuuttut eqquutsissimangikkai
- c) Oqartussaasoq piginnaatitaasoq amigaatinik annertuunik nassaarpat imaluunniit arlaleriarluni tunisassiornermik unitsitsisariaqarpat, aamma nerukkaatissanut akussanik tunisussarsiorfimmi aqutsisoq siunissami tunisassiorsinnaaneq pillugu naammattunik uppersaasinnaanngippat.

Immikkoortoq IV

Kapitali 8

Pillaasarneq pillugu aalajangersakkat

§ 26. Inatsisit allat malillugit sakkortuumik pineqaatissiissutit nammineq taamaallaat pisuussutigineqarsimappata, taava §§ 3-5, § 6, imm. 1 aamma 3, §§ 7-14, § 18, §§ 22-23, imm. 2-mik unioqqutitsisoq akiliisinneqarsinnaavoq. Ingerlatsivinnit il.il. (ataatsimoortutut inatsiseqartitsinikkut nammineertunit) unioqqutitsinerit pineqartillugit, taava ingerlatsivik akiliisitsissummut akisussaaffilerneqarsinnaavoq.

Immikkoortoq V

Kapitali 9

Atortuulersitsineq

§ 27. Nalunaarut ulloq 1.januar 2024 atortuulersinneqarpoq

Ilanngussaq 1

NERUKKAATISSANUT SULIFFEQARFINNUT PINGAARNERTUT NERUKKAATISSANIK
TUNISASSARSIORFIUSUNUT PIUMASAQAATIT, tak. § 10, imm. 1.

I. Eqqiluisaarneq pillugu aalajangersakkat

1. Nerukkaatissanut suliffeqarfiit nerukkaatissanik pingaarnertut tunisussarsiorfinnik akisussaaffillit qulakkiissavaat, nerukkaatissanut isumannaallisaanikkut ulorianaataasinnaasut pitsaaliorldorlugit, suujunnaarsinniarlugit imaluuniit annikillisaaviginiarlugit ingerlatsinerup aqunneqarnissaa.

2. Nerukkaatissanut suliffeqarfiit sapinngisartik tamaat, pingaarnerusutut tunisassiat piliorneqartut, piareersarneqartut, salinneqartut, poortorneqartut, toqqortarineqartut aamma assartorneqartut mingutsitsinermut aamma asiunissamut illersornissaat qulakkiissavaat.

3. Nerukkaatissanut suliffeqarfiit immikkoortoq 1-imi aamma 2-mi piusussaaffiit allassimasut eqquutsissavaat pingaarnerusumik tunisassiornermi ulorianaatit akiorniarneqarnerat pillugu inatsisit attuumassutillit eqquutsinnerisigut, matumani:

i) ass. silaannarmit, nunamit, imermit, naggorissaatinit, naasunut illersuutinit, biociderinit (tamanut illersuutinit) aamma nersutinut nakorsaatinit kiisalu eqqagassanik passussinermit piiaanermillu ulorianartumik mingutsitsinerup akiorniarneranut iliuusissat

ii) naasut peqqissusaat, uumasut peqqissusaat aamma avatangiisit, nerukkaatissanut akussat isumannaallisaavigineqarneranut pingaarutillit, matumani nappaatit tunillaassuunnerillu uumasunit inunnut tuniluuttartut aamma taakku tunillaatiasut pillugit nakkutuliinermut akiuiniarnermullu programmit.

4. Nerukkaatissanut suliffeqarfiit, pisariaqalerfinni, iliuusissanik naleqquttunik aalajangiissapput, pingaarnerusumik siunertaralugu:

a) atortorissaarutit, atortut, puut, karsit aamma qamutit assakaasullit suliaqarnermut, piareersaanermut, immikkoortiterinermut, poortuinermut, toqqorsinermut aamma nerukkaatissanut akussanik assartuinermut atorineqartartut eqqiartarneqassapput, aamma taakku eqqiarneqareerpat pisariaqassappat naleqquttumik toqunartuineqartassallutik

b) pisariaqartinneqassappat nerukkaatissat akussaannik tunisassiornermi, assartuinermi aamma toqqorsinermi eqqiluisaanikkut atugassarititaasunik kiisalu nerukkaatissanut akussat minguitsuunissaannik qulakkeerinninneq

c) imeq mingoqanngitsoq atorineqassaaq, ulorianartumik mingutsitsinermut pitsaaliuisoqartariaqarpat

d) uumasut aamma ajoqusiisartut ulorianartumik mingutsitsinissaat pitsaaliorneqassaaq

e) eqqagassat aamma akuutissat ulorianartut immikkut isumannaatsumillu toqqortarineqarnissaat aamma passunneqartarnissaat, ulorianartumik mingutsisisoqarnissaa pinaveersaartinniarlugu

f) poortuutissat nerukkaatissanut akussanut ulorianartumik mingutsitsinnginnissaannik qulakkeerinninneq

g) nerukkaatissanut akussat isumannaallisaavigineqarnissaannut attuumassuteqartumik pingaarnerusunik tunisassianit imaluuniit allanit misissugassanik tiguserit inernerit eqqumaffigineqassapput

II. Nalunaarsuiffiit

1. Nerukkaatissanut suliffeqarfiit ulorianaatinik akiuiniarluni iliuusissanut aalajangiunneqarsimasunut tulluurtumik aamma piffissamik aalajangersimasumi aamma nerukkaatissanut suliffeqarfiup angissusaanut aamma suussusaanut tulluurtumik nalunaarsuiffinnik ingerlataqassapput toqqortaateqarlutillu. Nerukkaatissanut suliffeqarfiit paasissutissat attuumassutillit pillugit nalunaarsuiffiit Fødevarestyrelsenimut takusinnaatissavaat.

2. Nerukkaatissanut suliffeqarfiit tulliuttut pillugit nalunaarsuisassapput:

a) ajoqusiinnaasut aamma nappaatit tamaasa, pingaarnerusunik tunisassianik isumannaallisaanermut sunniuteqarsinnaasut

b) pingaarnerusunik tunisassianit imaluuniit allanit suussusiliinissaq siunertaralugu misissugassatut tigusat inerneru, nerukkaatissiornermi isumannaallisaanermut pingaarutillit.

c) tunniussisarfik aamma nerukkaatissanut akussat tunniunneqartut annertussusaat.

3. Allat, ass. siunnersortit, nerukkaatissanut suliffeqarfiit ingerlataminnut attuumassutilinnik nalunaarsuiffinnik ingerlatsinerannik ikiorsinnaavaat.

Ilanngussaq 2:

NERUKKAATISSANUT SULIFFEQARFINNUT ALLANUT, NERUKKAATISSANIK PINGAARNERUSUMIK TUNISUSSARSIORFIUNNGITSUNUT PIUMASAQAATIT, tak. § 10, imm. 2.

ATORTORISSAARUTIT AAMMA ATORTUSSAT

1. Atortorissaarutit, atortussat, puut, karsit aamma qamutit assakaasullit, aamma nerukkaatissanut akussanik toqqorsiviit aamma taakku avatangiisaat qaninnerit eqqiluutsuutinneqassapput, aamma ajoqusiisartut akiorniarnerat siunertaralugu sunniuteqarluartunik programminik ingerlatsisoqassaaq.

2. Atortorissaarutit aamma atortussat qulaanit isigalugu sannaata titartarneri, ilusilersorneri, suliarineqarsimaneri aamma annertussusaata uuttuutai imaassapput,

a) naammaginatumik eqqiartarnissaat periarfissaqassaaq aamma/imaluunniit tunillannartuiarneqarsinnaasariaqarlutik.

b) mingutsitsisoqannginnissaa, bakterianik siaruaattoqannginnissaa aamma nalinginnaasumik pitsaanngitsumik tunisassiat isumannaallisaaviginerannut pitsaassusaannullu sunniutaasinnaasut pillugit kukkusooqarnissamat navianaatit annikillisarneqassapput. Maskiinat nerukkaatissanut akussanut attaveqartartut masatsinneqareerpata allarterneqartassapput.

3. Atortorissaarutit aamma atortussat, nerukkaatissanut akussaliornermi aamma/imaluunniit suliaqarnermi suleriaatsini atorneqartartut, akuttoqatigiissaartumik nakkutigineqartassapput, suleriaatsit allaaserineqarsimasut tunisassiornermut atugassatut aalajangiunneqareersimasut malillugit

a) Uuttuut aamma oqimaalutaatit atortussat, nerukkaatissanut akussaliorluni suliaqarnermi atorneqartartut tamarmik, oqimaassutsinut aamma annertussutsinut naleqquttuussapput, aamma eqqorluartumik atuunnerat akuttoqatigiissaartumik misiligarneqartassallutik.

b) Akoorutit nerukkaatissanut akussaliornermi atorneqartartut tamarmik, oqimaassutsinut aamma annertussutsinut naleqqutissapput, aamma naleqquttunik assigiiaamik akuukkanik aamma assigiiaamik imerpalasunik pilersitsinnaasariaqarlutik. Tunisassiortup akoorissutit assigiissuseqartumik akoorillaqqissuunerat qularnaallisaassavaa.

4. Atortorissaarutit silamit pissusissamisoortumik aamma/imaluunniit qullinit naammattumik qaammaqquteqassapput.

5. Kuuffinnut pissutsit pisariaqartitsinermut naapertuutissapput; nerukkaatissnut akussanut mingutsitsinissamik ulorianaateqanngitsumik ilusilersorneqarsimallutillu suliaasimassapput.

6. Imeq, nerukkaatissanut akussaliorluni suliaqarnermi atorneqartartoq, uumasunut atorneqarsinnaasutut naleqquttumik pitsaassuseqassaaq; imermullu aqquutit ledningit sunniinnaanngitsunik sanaajussallutik.

7. Eqqakkat aqqutaatigut errortuutikoq kuuffikkoortartoq-, imeq errortuutikoq aamma sialummit imeq piiarneqartassapput, taamatut atortussat aamma nerukkaatissanut akussanik isumannaallisaaneq aamma pitsaassuseq sunnertissinnaajunnaarlugit. Asiusimasut aamma pujoralaat killilersimaartinneqassapput akornusiisartut isaanissaat pitsaaliorniarlugu.

8. Igalaat aamma ammanerit allat pisariaqartitsiffimmi ajoqusiisartut isitsaaliorsinnaassavaat. Matut ussissumik matulluarneqarsinnaassapput aamma matoqqatillutik ajoqusiisartunik mattuussinnaallutik.

9. Qilaat, qilaat appartitat aamma allanit pequtinit aalajangiunneqarsimasunit nivingasut, ipeq katersuussinnaajunnaarlugu aamma aalap iminnguunnissaralua, skimmelsvampi kissaatigineqanngitsoq aamma sananeqaatit minnerit, nerukkaatissanut akussanik isumannaallisaanermik pitsaassusaanillu sunniisinnaasut killilersorniarlugit pisariaqartitsiffinni ilusilerneqarsimassapput, sananeqarsimassapput aamma naammassineqarsimassallutik.

SULISUT

Nerukkaatissanut suliffeqarfiit naammattumk amerlasuunik sulisoqassapput, taakku tunisassianik pineqartunik tunisassiornermut pisariaqartinneqartunik ilisimasaqassapput piginnaasaqarlutillu. Aaqqissuussinermut pilersaarusiortoqassaaq, tassanilu aqutsisut piginnaasaat paasissutissiivigineqassallutik (ass. soraarummeersimanermut uppernarsaatit aamma sulisimanermut misillittakkat) aamma suut akisussaaffigeneraat ilanngullugit allassimassallutik, taakkulu Fødevarestyrelsenimit pissarsiarineqarsinnaassapput. Ingammik nutaamik allannguisoqarnerit tamaasa atorfillit tamarmik suliasatik pillugit, akisussaaffitik aamma imminnut piginnaatitsissutaasimasut pillugit erseqqissunik allakkatigut paasissutissanik tunineqartassapput, taamaalilluni nioqqusiap pitsaassusaa kissaatigineqartoq anguneqarsinnaaqullugu.

TUNISUSSARSIORNEQ

1. Tunisassiornermut akisussaasutut inuk piginnaasalik toqqarneqassaaq.
2. Nerukkaatissanut suliffeqarfiit, tunisassiornermi killiffiit assigiinngitsut suleriaatsit aalajangersimasut malillugit aamma ilitsersuutit aalajangersoriikkat allassimasut malillugit, nerukkaatissiornermi suleriaatsimi killiffiit aarlerinaatillit pillugit suussusilerneqartarnissaannik, nakkutilliiffiginissaannik aamma aqussinnaanissaannik siunertaqartut ingerlanneqartarnissaat qulakkiissavaat.
3. Pisariaqartitsiffimmi bakteriaqalinnginnissaq imaluunniit taakku siaruaatinnginnissaat aamma kukkusoqarnissaa pitsaaliornisarlugit teknikkikkut imaluunniit aaqqissuussaanikkut iliuusissat alajangiunneqartariaqarput. Suliaqarnerup nalaani naammattunik aamma tulluartunik nakkutilliinermut atugassanik peqartariaqarpoq.
4. Inuit uumasullu peqqissusaannut sunniisinnaasunik inerteqqutininik nerukkaatissaateqarneq, akussanik kissaatigineqanngitsunik peqarneq aamma allanik akussanik mingutsitsisartunik inerteqqutaasanik peqarneq inuit uumasullu peqqissusaannut ulorianaateqartut nakkutigineqassapput, aamma nakkutilliinermut periaatsit naleqquttut, ulorianaatinik annikillisaanissaq siunertarlugu aalajangiunneqarsimassallutik.
5. Eqqagassat aamma atortut, nerukkaatissatut naleqqutinngitsut immikkoortinneqartariaqarput suussusilerneqarlutillu. Atortussat, uumasunut nakorsaatinik ulorianartumik qaffasissuseqartunik, akussanik mingutsinneqarsimasunik imlauunniit allatut ulorianaatilinnik imallit, naleqquttumik iginneqassapput aamma nerukkaatissatut atorneqaaqqusaanatik.
6. Nerukkaatissanut suliffeqarfiit tunisassiat kingunissaqarluarmik sumiissusiorneqartarnissaat pillugu naammattunik iliuusissanik aaqqissuissapput.

7. Tunisassiat nalunaaqtsersorneqarnerani nerukkaatissanut imaluunniit siunertanut allanut atugassaanersut erseqqissumik allassimassaaq. Nerukkaatissat ilaat immikkoortitat nerukkaatissatut atugassaanngitsut nalunaarutigineqarsimappata, nalunaarut taanna kingusinnerusukkut suliffeqarfimmit allamit allanngortinneqarsinnaanngilaq.

PITSAASSUTSIMIK NAKKUTILLIINEQ

1. Naleqqqutsillugu, pitsaassutsimik nakkutilliinermut inuk akisussaasoq toqqarneqassaaq.
2. Nerukkaatissanut suliffeqarfiit pitsaassutsimik nakkutilliisarnermut atatillugu laboratoriamik tulluurtunik sulisulinnik atortulinnillu atuisinnaassapput.
3. Pitsaassutsimik nakkutilliinermut pilersaarut allallugu suliarineqassaaq aallartinneqarlunilu, tassanilu suliaqarnermi killiffiit aarlerinaatillit, misilitassanik tigusinermi aamma taakku qanoq akulikitsigisumik ingerlanneqartarnissaat pillugu suleriaatsit, misissuinermi periutsit aamma akulikissutsit, tunisassianut atortussanit piareersariikkanit tunisassianut naammassineqarsimasunut immikkoortitatut nalunaarsorneqarsimasunik tamanik eqquutsitsisimanersoq pillugu misissuineq, kiisalu immikkoortitanik nalunaarsorneqarsimasunik eqquutsitsisimanngikkanni susoqarnissaa allassimassaaq.
4. Tunisassiat suminngaanneersuunerannik sumullu nassiunneqarsimanerannik paasisaqarfiginnissinnaaneq qulakkeersinnaaqqullugu tunisassioruq atortussiassat suut naammassillugu tunisassiami atorineqarsimanersut uppersarsaasiussaaq. Uppersarsaat taanna piffissami aalajangersimasumi Fødevarestyrelsenimit takuneqarsinnaassaaq, apeqqutaatillugu nerukkaatissanut akussat suna siunertarlugu tuniniaanissamik pilerisaarutigineqarnerisut. Aammattaaq akussat aamma tunisassiat immikkoortitat tamarmik suliarineqartut tuniniaanissamik pilerisaarutigineqartut, imaluunniit tunisassiornermi ilaasut ingerlatat tamarmik aalajangersimasut (ingerlaavartumik suliaqarnermi) naammattumik misissugassanik tigusiffigineqartassapput suleriaaseq tunisassioruq aalajangiuteerersimasaa malillugu, aamma misissugassatut tigusat suminngaanneersuunerannik sumullu nassiunneqarsimanerannik paasisaqarfiginnissinnaaneq qulakkeerniarlugu toqqortarineqassapput (tunisassianik suliaqarneq taamaallaat tunisassioruq nammineq atugassaatut suliarineqarpata, piffissami akuttoqatigiimmik misissugassanik tigusisoqartassaaq). Misissugassatut tigusat piffissanngorpat aatsaat ammagassarineqassapput aamma ima ilisarnaatilerneqassallutik ajornanngitsumik suussusaat paasineqarsinnaalersillugit; misissugassatut tigusap nalinginnaasuunngitsumik allanngortinneqarnissaa pillugu aamma peqquserlulluni allanngortitsisoqarnissaasa pinaveersaartinneqarnissaat qulakkeerniarlugu toqqortarineqassapput. Piffissami aalajangersimasumi Fødevarestyrelsenimit takuneqarsinnaatinneqassapput, apeqqutaatillugu nerukkaatissanut akussat suna siunertarlugu tuniniaanissamik pilerisaarutigineqarnerisut. Uumasunut nerukkaatissanut akussat, inuussutissanik tunisassiornermut atorineqartussaannngitsut pineqarpata, nerukkaatissanut akussanik tunisassioruq nioqqusiamit naammassereersumit misissugassatut tigusiffigineqarsimasut kisiisa toqqorsimasuutigissavai.

UULIAT, ORSUT AAMMA TAAKUNANNGA TUNISASSIAASIMASUT DIOXIN PILLUGU NAKKUTILLIIFFIGINEQARNERAT

1. Nerukkaatissanut suliffeqarfiit orsunik, uulianik imaluunniit taakkunannga tunisassianik aalajangersimasumik nerukkaatissani atorineqartussanik, matumani nerukkaatissanut akuukkanik tuniniaanissamik pilerisaaruteqartut, tunisassiat pineqartut laboratoriat piginnaasaqartutt dioxininik aamma dioxininut assingusunik PCB'-iinik misissuitittassavaat, soorlu tamanna **Kalaallit Nunaannit**

nerukkaatissat avammut nioqqutigineqartartussat aalajangiussat tuniniaanissamik pilerisaarutigineqartarnerat pillugu Kalaallit Nunaannut nalunaarummi allassimasoq.

2. Nerukkaatissanut suliffeqarfiit HACCP-systemiannut (ulorianaatinik misissuinerit aamma immikkoortitat assuarlernartut nakkutilliiffigineqartussat) ilassutissatut misissuineritt immikkoortoq 1-imi allaaserineqartut tulliuuttut minnerpaaffissamut piumasaaqatit malillugit suliarineqartassapput (allassimangippata, taava tunisassiat immikkoortitat misissorineqartussat 1.000 tonsit qaangersimassangilaat:

a) Nerukkaatissanut suliffeqarfiit, aalisakkanit uulialiortartut:

i) aalisakkat uuliaannik tunisassiat immikkoortitat 100 %-ii, uulia ukunanga tunisassiaasimappat:

— tunisassiat allat aalisakkap uuliaanit sukuluiakkaniunngitsoq aalisakkap uuliaanit allanit pilersinneqarsimasut

— aalisakkanit nioqqutissat, siusinnerusukkut nakkutilliiffigineqarsimangitsut imaluuniit suminggaaneereri allassimangitsut,

— suliffeqarfinit, Fødevarestyrelsenimit inuussutissanik avammut tunisartussatut akuersissuteqanngitsunit aalisakkat sinnikuinik nerisassatut atugassanik nioqqusiarineqartartut

— saarullernat imaluuniit ammassassuit atlantisk menhaden

ii) aalisakkat uuliaannik tunisassiat immikkoortitat 100 %-ii, aalisakkat uuliaannit sukuluiakkaniunngitsoq aalisakkap uuliaanit allanit pilersinneqarsimasut, suliffeqarfimmiit allamut ingerlanneqartut

iii) nr. i)-imi allaaserineqarsimangitsuni aalisakkat uuliaat 2.000 tonsiugaangat misissuineq 1

b) Orsunik akooriffiit suliffeqarfiit:

i) aalisakkat uuliaannik tunisassiat immikkoortitat 100 %-ii suliffeqarfiup pissai, litra a)-imi ilaangitsut imaluuniit uuliat aamma orsut **Kalaallit Nunaanni suliffeqarfiit nerisassaleriffiit pillugit nalunaarummi** ilaasunit suliffeqarfinit nerisassaleriffiusunit atoqqinneqarsimasut imaluuniit

ii) orsunik akuukkanit aamma aalisakkat uuliannit immikkoortitat 100 %-ii nerukkaatissatut naatsorsuussat.

Nerukkaatissanut suliffeqarfiup iluseq sorleq toqqarsimallugu oqartussaq piginnaatitsisoq ilisimatissavaa.

3. Tunisassianit immikkoortitat punkt 2 malillugu annerpaaffissaannit annertunerusut nassiunneqarsimasut uppenarsarneqarsinnaappat, aamma misissugassanik tigusisoqarsimappat, taava eqqortumik tigusanit misissuinerimi inernerit aamma poortorluarneqarsimappata akuerineqarsinnaapput.

4. Nerukkaatissanut suliffeqarfiit allagaatinik uppenarsaasinnaappat, tunisassiat immikkoortitat imaluuniit punkt 2-mi pineqartumi immikkoortitami ilat tamarmik, aamma suliffeqarfiup pissai, tunisassiornerup ingerlanerani suliarineqarnerani imaluunniit siammarterneqarneranni siusinnerusukkut misissorineqareersimappata, taava nerukkaatissanut suliffeqarfiit tunisassianik immikkoortitanik pineqartunik misissuittitsinissaanik pisussaaffeqarunnaartinneqassapput.

5. Tunisassiat immikkoortitat tamarmik immikkortoq 2 malillugu tunisassiat pineqartut imaluunniit ilaat tamarmik misissorineqarsimasut uppenarsaatitaqassapput, imaluuniit laboratoriamut misissuiffigineqartussatut tunniunneqarsimasut pillugit uppenarsarneqarsimassallutik, tak. punkt 1, tunisassiat immikkoortitat punkt 2, litra a, nr. I-imi allaaserineqartut pinnagit.

Misissuisimanermut uppersaata tunniussinermut aamma tunisassianut immikkoortitanut misissugassanik tigusiffigineqarsimasunut paatsuugassaannngitsumik ilanngullugu atassuserneqassaaq. Taanna atassusiliineq suminngaanneersuunerinik sumullu nassiunneqarsimanerannik paasisaqarsinnaanermut aqqissuussinermi, pisiniarfigisartakkamit pilersinneqarsimasumit uppersaata allaaserineqassaaq. Pingaartumik tunniussineq tunisassianik immikkoortitanit arlalinnit imaluunniit ilaannit katitigaasimappat taava uppersaata saqqummiunneqartussa q tunniussami ilaasunut ataasiakkaanut tamanut uppersaataassaaq. Tunisassiaq suliffeqarfimmit nassiunneqartussa q misissugassamik tigusiffigineqarpat, taava misissuisimanermut nalunaarusiaq tunisassiaq misissuiffigineqarsimasoo pillugu uppersaataassaaq.

Tunisassianit tunniussat tamarmik punkt 2, litra, a, nr. iii)-imi allaaserineqartut, uppersaataamik ilaqartinneqartassapput, tunisassiat pineqartut punkt 2, litra a, nr. iii)-mi piunnaasat ineqqutsitsisut uppersaataarlugu. Pisariaqartinneqarpat tunisassiamut immikkoortitamut imaluunniit immikkoortitanut tunniunneqarsimasunut misissuisimanermut uppersaata tigusissusamut nassiunneqassaaq, suliffeqarfimmi aqutsisup laboratoriat akuersissutilinnit misissugaq tiguppagu.

6. Nerukkaatissanut suliffeqarfiup aqutsisuata laboratoria misissuittippagu, tak. punkt 1, taava laboratoria nalunaarfigissavaa misissuinerup inernerana Fødevarestyrelsenimut nassiuteqqullugu, **Kalaallit Nunaanni nerukkaatissat avammut nioqqutigineqartartussat aalajangiussat tuniniaanissamik pilersaarutigineqartarnerat pillugu Kalaallit Nunaannut nalunaarut** malillugu imassat annertunerpaaffissaatut aalajangiunneqarsimasut aamma nammineq nunami nerukkaatissatut niuerutigineqartussat qaangerneqarsimappata.

Nerukkaatissanut suliffeqarfiup aqutsisuata laboratoria, nammineq nunagisaminiinngitsoq, misissuittippagu, taava laboratoria nalunaarfigissavaa misissuinerup inerneranik Fødevarestyrelsenimut nassiussissasoq.

Nerukkaatissanut suliffeqarfiup aqutsisuata Fødevarestyrelsen nalunaarfigissavaat, nammineq nunagisaminiinngitsoq laboratoria misissuiffigitikkuniku. **Kalaallit Nunaanni nerukkaatissat avammut nioqqutigineqartartussat aalajangiussat tuniniaanissamik pilersaarutigineqartarnerat pillugu Kalaallit Nunaannut nalunaarummi** allasimasutut misissuineq laboratoriap ingerlakkaa uppersaataneqassaaq.

TOQQORSINEQ AAMMA ASSARTUINEQ

1. Nerukkaatissanut akussat suliareriikkat nerukkaatissanik suliarereerneqarsimanngitsunit aamma akuutissanit aamma nerukkaatissanut akussanit immikkoortinneqassapput bakterissat taakku akornanni siaruaannissaat pinngitsoortinniarlugu, aamma poortuutissat eqqortut atorineqassapput.

2. Nerukkaatissanut akussat puuni tulluurtuni toqqortarineqarlutillu assartorneqassapput. Sumiiffinni toqqorsinermi pissutsit pitsaasut qulakkeerniarlugit sumiiffinni ilusilersorneqarsimasuni, aqqissuunneqarsimasuni aamma aserfallatsaalivigineqartuni, aamma inunnit ikittuinnarnit nerukkaatissanut suliffeqarfiup akuerisaanit iserfigineqarsinnaasuni, toqqortarineqassapput.

3. Nerukkaatissanut akussat toqqortarineqassapput aamma assartorneqassallutik, taamaallutik ajornanngitsumik suussuilerneqarsinnaallutik, paarlaassinissaq imaluunniit mingutsitsinerup siaruaannissaa pinaveersaartillugu, aamma ajornerulersitsineq pitsaaliarlugu.

4. Nerukkaatissanut puut aamma atortussat, assartuinerumut, toqqorsinermut, ingerlanneqarnerannut, passussinermut aamma oqimaalutaanermut atortut eqqiluitsuutinneqassapput. Eqqiluisaartitsinermut programmit eqqunneqassapput, aamma eqqiaanermut qaqqorsaatit bakterijaajaatillu sinneri annikillisarneqartassallutik.

5. Asiusut annikillisaaffigineqassapput aamma nakkutigineqarlutik, ajoqusisartunit ajoquserneqarnerat annikillisaaviginiarlugu.

6. Siunertamut iluaqutaappat, kissassuseq appasinnerpaaffimmiitinneqassaaq aalaq iminnguutinneqannginniassammat aamma asiusoqannginniassammat.

7. Aalisakkanit uulia, aalisakkanik qajuusaasianik, aalisakkanik uuliamik, aalisakkanit panertunik aamma aalisakkanit akorneqangitsunit tunisassiat suliarineqartarnerat pillugu Kalaallit Nunaannut nalunaarummi allassimasutut, nerineqartussatut naatsorsuussaangitsaq, aamma nerukkaatissatut atorineqartussatut aalajangiunneqarsimasooq, nalunaarummi taaneqartoq malillugu toqqortarineqassaaq assartorneqarlunilu nalunaarut taaneqartoq malillugu.

NALUNAARSUINEQ

1. Nerukkaatissanut suliffeqarfiit tamarmik, piffissami sukulluunniit nioqqusianik illuutiminniitsitsineq ajortut tuniniaaginnartartutut atuuffeqartut ilanngullugit, paasissutissat attuumassutillit nalunaarutigissavaat aamma toqqortaralugit, paasissutissat pisinermut, tunisassiornermut aamma tunisisarnermut paasissutissanik ilaqassapput, taakkulu suminngaanniit tiguneqarsimaneramik sumut tunineqarsimanerannut kinguneqarluartumik paasinarneqarnissaat periarfissinniarlugu paasissutissartaqassapput, matumani avammut tunisat naggataasumik apuuffissaat ilanngullugu allassimassalluni.

2. Nerukkaatissanut suliffeqarfiit, piffissami sukulluunniit tunisassianik illuutiminniitsitsineq ajortut tuniniaaginnartartutut atuuffeqartut pinnatik, tulliuttut nalunaarutigisassavaat toqqorsimatillugillu:

a) Suliaqarnermi suleriaaseq aamma nakkutilliineq pillugit uppernarsaatit

Nerukkaatissanut suliffeqarfiit uppernarsaasiornermut aaqqissuussineramik peqassapput, tassunga nerukkaatissiorluni suliaqarnermi immikkoortut navianaatillit immikkoortissinnaanissaannik aamma navianartut aqussinnaanissannik siunertaqassaaq, soorlu pitsaassutsimik nakkutilliinermut pilersaarummik suliaqarluni aallartitsillunilu. Nakkutilliinermut attuumassutilimmut inernerit toqqorneqartassapput. Uppernarsaasiorneq taanna toqqortarineqassaaq, taamaalilluni tunisassiat immikkoortut ataasiakkaat tuniniaanissamik pilersaarutigineqartut tunisassiarineqarnera pillugu oqaluttuassartaq paasineqarsinnaangorlugi aamma naammagittaalliortoqassagaluarpat akisussaaffik inississinnaaqullugu.

b) suminngaanneersuunerinik paasisaqarfiginnissinnaanermik uppernarsaaneq, pingaanermik ukuningga:

i) nerukkaatissanut akuutissiat:

— suliffeqarfup, akuutissanik tunniussiffigineqarsimasup atia najugaalu, akuutissat tunniunneqarsimasut suussusaat aamma annertussusaat, aamma tunisassiat immikkoortut normuat.

iii) akooiikkat:

— suliffeqarfup, akooiikkanik tunniussiffigineqarsimasup, atia najugaalu, akooiikkat tunniunneqarsimasut suussusaat aamma annertussusaat, aamma tunisassiat immikkoortut normuat.

iv) nerukkaatissanut akussanit akuukkat/nerukkaatissat:

- tunisassiortup imaluuniit akuutissanik/akooriikkanik tunniussisup atia najugaalu, akooriikkat atorneqarsimasut suussusaat aamma annertussusaat kiisalu tunisassiat immikkoortut normuat — nerukkaatissanik aamma nerukkaatissanik akuukkanik akussanik assut akuneqarsimasunik tunniussisup atia najugaalu, kiisalu tunniussinermi ulloq
- nerukkaatissap akuukkap suussusaa, annertussusaa aamma sunik akoorneqarsimanera
- nerukkaatissat tunisassiat imaluuniit nerukkaatissat akuukkat suussusaat annertussusaallu, suliaqarnermut ulloq kiisalu pisisup atia najugaalu.

NAAMMAGITTAALLIUUTIT AAMMA TUNISASSIANIK UTERTITSINERIT

1. Nerukkaatissanut suliffeqarfiit naammagittaalliuutit nalunaarsorneqarnissaanut aamma suliarineqartarnissaannut aqqissuussinermik aallartitsissapput.

2. Pisariaqassappat, tunisassiat siammarteriffianit sukkasuumik utertinneqartarnissaat pillugu aqqissuussinermik atulersitsissapput. Tunisassiat utertinneqarsimasut suneqartassanersut allakkatigut suleriaatsitigut aalajangiissapput, aamma tunisassiat tuniniaanissamik pilerisaarutigineqaqqissappata, taamaaliunnginnermi nutaamik pitsaassutsimik nakkutilliiffigineqaqqissapput.

Ilanngussaq 3

AALISAKKANIT QAJUUSAASIANIK EU-MUT AVAMMUT TUNISASSANIK SULIAQARNERMUT PIUMASAQAATIT IMMICKUT ITTUT, tak. § 10, IMM. 3.

Aalisakkanit qajuusaasiorluni suliaqarnermut immikkut ittumik piumasaqaatit tulliuuttut atuupput, piumasaqaatit, uumasunut allanut tamugartortartut pinnagit, meqqullit uumasut ilanngullugit uumasunut kinguaassiorinneqartartunut nerukkaatissatut aalajangiussaapput:

a) Aalisakkanit qajuusaasiat aallarnisaatitut suliaqarfinni suliarineqartassapput, tak. **aalisakkanit qajuusaasiat, aalisakkat uuliaat, aalisakkat panertut aamma aalisakkanik tunisassiat akorneqarsimanngitsut, nerineqartussatut aalajangigaanngitsut, suliarineqartarnerat pillugu Kalaallit Nunaannut nalunaarut**, tassani tunisassiat suliarineqartartut taamaallaat pineqarput ukunangaanneersut:

i) uumasut imarmiut, miluumasut imarmiut pinnagit:

- Aalisakkat, pingaarnertut klassimut Agnatha-mut aamma klassinut Chondrichthyes aamma Osteichthyes-inut ilaasut
- Uumasut qituttut, Mollusca-nut ilaasut
- Saattuat, Crustacea-nut ilaasut

ii) uumasut imarmiut qiteraleqanngitsut kinguaassiorinneqartartut, litra i)-imi taaneqartut pinnagit, imaluuniit

iii) nerpissuut suussutsimeersut Asterias rubens, taakku tunisussarsiorfimmi sumiiffimmi Kalaallit Nunaanni suliffeqarfiit nerisassaleriffiit pillugit nalunaarut, ilanngussaq 1 malillugit allaaserineqarsimasuni, aamma taakku malillugit klassinut immikkoortinneqarsimasut.

b) Allataq »Aalisakkanit qajuusaasiat— tamugartortunut nerukkaatissanut atorneqassanngillat, kisianni tamugartortunut atuiunnaarsinneqarsimangitsunut atorneqarsinnaapput« erseqqissumik niuernermit ilaatinneqartumik uppernarsaammi imaluunniit peqqissusermut akuersissummut ilaatinneqartumi allassimassapput, sunut attuumassuteqarnerisut apeqqutaatillugu, aalisakkanit qajuusaasiat, aalisakkat uuliaat, aalisakkat panertut aamma aalisakkanik tunisassiat akorneqarsimanngitsut, nerineqartussatut aalajangigaanngitsut, suliarineqartarnerat pillugu Kalaallit Nunaannut nalunaarummi § 19-i malillugu, kiisalu aalisakkanut qajuusaasiat allagartaat malillugu.

Ilanngussa q 4

TUNINIAANISSAMIK PILERISAARISARNERMUT AKUERSISSUTEQARNISSAMUT PIUMASAQAAT

Akuutissat, Kalaallit Nunaanni nerukkaatissat avammut nioqqutigineqartartussatut aalajangiussat tuniniaanissamik pilerisaarutigineqartarnerat pillugu Kalaallit Nunaannut nalunaarummi akuersissutigineqartut:

— teknologiimit akuutissaliat: akuutissat, »antioxidanter«-inut eqimattanut atornissamut tulluarsakkanut ilaasut: akuutissat annerpaaffissalerlugit imallit

Ilanngussaq 5

SUUSSUSILIINERMUT NORMUT

Suussuliinermut normu ima aaqqissuunneqassaaq:

1. Ilisarnaat »α«, suliffeqarfik nerukkaatissanut akussaasiorfik akuersissuteqarpat.
2. Kalaallit Nunaannut ISO-kodi.
3. Nunamut namminermut referencenummer amerlanerpaanik 8-nik kisitsisinik, naqinnernik, akunnernik aamma immikkut ilisarnaatinik il.il. allassimasoq.